

MOQHEKANYETSI WA VAT O AHLOLETSWE DILEMO TSE 15 TJHANKANENG

Pretoria, Labobedi 27 Phato 2019 – Rakgwebo wa Welkom ya qhekanyeditseng SARS ka ho sebedisa disebediswa tsa ditherasete mmoho le ditheo tse ding tse molaong, o ahloletswe ho hlola tjhankaneng dilemo tse 15 ka Labohlano la 23 Phato 2019.

Mong. Recado Williams Davids o iphumane a le molato diqosong tse 404 tsa boqhekanyetsi ka ho nehelana ka dikgutliso tsa mokunyata tsa Lekgetho la Boleng bo ekeditsweng (VAT) ho SARS, moo a neng a tsebahatsa diphetho le lekgetho la ditjeo tsa hae tsa leshano. Boqhekanyetsi bona, bo etsahetseng pakeng tsa 2007 le 2015 bo bile teng ka lebaka la tshebediso ya ditheo tse 12 tsa molao, ho kenyeleditswe le baemedi le ditho tsa tsona.

Mong. Davids o iphumane a le molato ho latela tumellano ya ho dumela molato eo a e fihlelletseng le mmuso.

Diqoso tsena di bokelletswe mmoho bakeng sa kahlolo. O ile a ahlolelwa dilemo tse leshome le metso e mehlano tjhankaneng tseo tsa tsona tse 6 di fanyehilweng tlasa dipehelo. Seo se bolela hore ho dihilwe kahlolelo ya ho hlola tjhankaneng nako ya dilemo tse robong.

Nyeweng e nngwe, lekgotla la Makgistrata la Kimberly le dihile kahlolelo ya dilemo tse hlano e fanyehilweng ho rakgwebo wa Kimberley bakeng sa diqoso tse 32 tsa boqhekanyetsi ba VAT, le ditlolo tse ding tsa molao tse 47 tse akaretsang boqhekanyetsi le ditlolo tse ding tsa molao tsa VAT le Melao ya Tsamaiso ya Lekgetho.

Mong. Joseph Thabo Modupe, eo e leng modulasetulo wa Droogfontein Community Property Association mme ebile e le mongakgwebo ya ditekesi, o bile le boqhekanyetsi ba VAT ka tshebediso ya dikgwebo tsa hae tse pedi. O ile a fuwa kotlo ya R50 000 mme a laelwa ho lefa SARS tjehelete eo a e fumaneng ka boqhekanyetsi.

Tumellanong ya ho dumela molato eo a fihlelletseng le mmuso, o dumetse hore o ile a qhekanyetsa SARS tjehelete e kana ka R550 000 ka ho se talole lekeno lohle le ho fana ka ditseko tsa leshano. Dikgwebo tsena tse pedi le tsona di ile tsa hloleha ho fana ka dikgutliso tse 30 tsa VAT pakeng tsa 2013 le 2017.

Ho feta moo, Mong. Modupe o ile a iphumana a le molato diqosong tse 8 tsa boqhekanyetsi le ho fana ka di-invoese tsa leshano ho SARS ho tshahetsa lekgetho la ditjeo tsa hae tseo a neng a di tseka, le ho hloleha ho fana ka kgutliso ya hae ya lekgetho la lekeno bakeng sa selemo sa lekgetho sa 2014.

O se a lefile SARS bokaalo bo bonahalang mme e setseng e tla leshwa ho latela ka moo lekgotla le laetseng ka teng.